

PITA TAKADA KAAKU

Tāmaa kè è n̄ n̄eroo

¹ Mamoma Pita, Yesu Kirisi z̄iri bé à takada kè kè Luda gbē kè āo de nibon̄o ū anduna kè guu, kè āo f̄aak̄ōana bùsu kèkiin̄o guun̄one: P̄ontu, Galatia, Kapadosia, Asia k̄on Bitiniao.

² De Luda ḡiake à a d̄o, ben à a se, a ḡo à p̄o ū k̄on à Ninii gbāaa, le à m̄i sie Yesu Kirisine, à aru a gbāsī gogo. Luda gbēke k̄on aafiao kaaraare.

³ Wà Luda wa Dii Yesu Kirisi De s̄abu kpá! À s̄u b̄ita guu à wa i dufu k̄on Yesu Kirisi f̄ena gan gbāaa, ben wá tāmaa kè è n̄ n̄eroo v̄i,

⁴ zaake túbi kè dienaare ludamb̄e pi è yakaro, è gbāsī kpáro, à maa è yāaro.

⁵ Luda sorumi mà, le à a m̄i sí a náane kè ée kee yānzi, ben èe a d̄akpaa k̄on a gbāaa ai à gá b̄o m̄isina p̄io gupuraa guro z̄āan̄a.

⁶ Ée p̄onnaa kee k̄on yā p̄io, baa kè é nawēa ke ḡia féte ȳagwana bori s̄anda píngi yānzi.

⁷ Lán wè vura maa d̄o té guu nà, len ȳagwana p̄in̄o e a ludanaanekena ȳo à gwa le, zaake a ludanaanekena pi b̄e v̄i de vura kè à gakuì è yāala maama. Tó a b̄o maa, Luda é a s̄abu kpá Yesu Kirisi suguro z̄i, ée a kpe da k̄on gakuio.

⁸ Baa kè ée à ero, á yezi. Baa kè ée w̄e siàle zikiro, ée à náane kee, ben ée p̄onna b̄ita kè ḡe onalaa kee,

⁹ kè ée a ludanaanekena gbè ee a m̄isina ū yānzi.

¹⁰ Annabin̄o ḡiake wà gbēke kè Luda é keao yā ò, āo m̄isina pi yā gwà, āo à tàasi kè.

11 Kirisi Ninii kè kú n guu gĩake à nawēa kè Kirisi pì é kee òhne kōn gakui kè eé e à gberaao, ben aō wète wà yā pì zé dō kōn à gurōo.

12 Ben Ludaa tò aō dō kè yā kè aōe oo pì de n guro pò ūro, a pómē. Tia sa baarunnakparinō yā pì òare kōn Luda Nini kè Luda pì zì bōna ludambēē gbāaaō. Baa malaikanō e oōsi kaa yā pì dōnazi.

Kuuna adona

13 Beee yānzi à a laasuu vu iin, àgō a zīnda kūna dō, a wēē gō dō gbēkēē kè Luda é keare Yesu Kirisi sugurō zīzi seka sai.

14 Lán á de Luda né kè aōe à yā maano ū nà, àton tó dà zaaa kè á vī yā a wēesiagurō dōare aero.

15 Ludaa kú adoname. Lán à a sisi à a se nà, àgō kú adona a yākena píngi guu.

16 Zaake wà kè Luda yān wà bè:

Àgō kú adona,
zaake má kú adoname.

17 Zaake Luda è yākpae ke kōn baadeo a yākenaa n wēē gwana sai, tó ée à sisii De, à vīa kene a nibōkēē guu kè.

18 Á dō lán Luda a bō kuuna kori kè de a fēeakaarayā ūu guu nà. Ludaa e a bō kōn pò kè à gakui è yāaoro lán vura ke kondogi bà,

19 à a bō kōn Kirisi aru gakuideeome, kè de lán sāne bōro kè bōgbe vīro à gbāsī vīroo bà.

20 Luda gĩake à à diē zaale èe anduna káero, ben à bōoare gupuraa guro zāa kēno zī.

21 Beee yānzin ée Luda náane keēzi. Luda à bō gaan à gakui kpāa, le à e à a náane ke, a wēē gō dōzi.

22 Lán mìsiēna yāpuraane a gbāsī gògo nà, ben á gbēkēē vī kōo monafiki sai, àgō yekōzi kōn nòseō do.

²³ Luda a i dufu kōn a yā wèndidee kè ègō kuu gbāaa. Yā pì de póbórii kè è gaa ũro, póbórii kè è garoomε.

²⁴ Baade píngi de lán sè bàme,
aō gakui de lán sèvu bàme píngi.

Sè è gaga, à vú è kwé,

²⁵ mōde Dii yā ègō kuu guro sānda píngi.
Yā pì bé à de baaru nnaa kè wà kpàaree ũ.

2

Gbè wèndidee

¹ Beee yānzi à yā zaa píngi tó kōn εgetona píngio kōn mōnafikio kōn nòsegōaanō kōn kōyakanao.

² Lán nékpāntēnō ègō yō'i ni deε nà, àgō Luda yā kè de lán zwi'ipu wásawasa bà ni deε le se, le à è à bíta kū a m̀sina zé guu,

³ tia sa kè á dō kè Dii maa.

⁴ À sōzi, àmbe gbè wèndidee kè wà gizi ũ, mōde Luda à sè bèεdee ũ.

⁵ Apinō sō, àmbe gbè wèndidee kè Ludaa e a kpé εε boonō ũ. Àmbe à gbàgbārinō ũ, eè saa kè è káne o kōn à Ninii gbāaaō Yesu Kirisi gāzī.

⁶ Zaake wà kè Luda yān wà bè:

N̄ gwa, mée gbè diεε Zayōn,
ēdaεgbε bèεdee kè má sè ũ.

Wí é gbē kè èè à náane keε kūro.

⁷ À de gbè bèεdee ũ amōa kè ée à náane keεnōne,
mōde à de le gbē kè aōōe à náane keεroonōnero.

Gbè kè kpéborinō pā kpàzi

bé à gō kpé gooda gbè m̀idee ũ.

⁸ Lemε dō à de:

Gbè kè wè gèn síá ũ,
gbèsi kè wè kpáàla wà léε ũ.

Aǎ gèn síá, kè aǎε Luda yǎ daro yǎnzi. Len Ludaa diéǎne le.

⁹ Ámbe borii kè Luda n sénε ũ, kínano kǎn sa'orino ũ, à gbē kè aǎ kú adonano ũ, le àgae Luda kè à a sisi a bε gusiaan, à gèao a gupura bǎnsae guu sáabu kpá.

¹⁰ Á de Luda gbēno ũ yǎro,
mǎde tia a gǎ n ũ.

Ludaa e sùu keao yǎro,
mǎde tia à kèao.

Kuuna ludanaanekerisainε té

¹¹ Ma gbē yenzideeno, lán á de nibε kǎn bǎamεno ũ nà anduna kè guu, méε lé daawame, à mì kē a dà zaaa kè aǎε zǎ káanonε.

¹² Àgǎ kuu gbē bèedeeno ũ kifino té. Lemε baa tó aǎ a diε zaakerino ũ, tó aǎ yǎ maaa kè éε keeno è, aǎε Luda sáabu kpá gurε kè eé móǎzi.

¹³ À mì siε ikodee kè gbēntee dienoε n píngi Dii yǎnzi, kína kè gbāa vǎ deǎlaan yoo,

¹⁴ ke gbāadee kè à diε à wéε tā zaakerino à maakero sáabu kpá.

¹⁵ Luda pǎyezín yè: A yǎmaakena sàabu é yǎnko wéesiadeeno lé yǎéǎne.

¹⁶ Àgǎ wéenenε ũ, mǎde àton tó a gǎna wéenenε ũu gǎare zaakena zé ũro. Àgǎ kuu Luda zǎblerinε ũ.

¹⁷ À bèε li gbē píngine. Àgǎ ye a Yesude daanǎzi. À vǎ ke Ludane. À bèε lí kínane.

¹⁸ Zǎkerino, à mì siε a diinoε, à bítakeε dǎǎne yǎ píngi guu. Èε ke dii maa nǎsedodeenoε nǎtēenlo, mǎde kǎn n gbē pǎsǎnoε se.

19 Tó wà wée tàawa pã, tó a mena fè Luda yãzi, bee sáabu vïare.

20 Tó wà a gbẽ a taari yãzi, tó a mena fè, bee tó nnaa vï máa? Mòde tó a nawẽa kè yã maaa kè á kè yãzi, tó a mena fè, Luda é a sáabu kpá.

21 Beee yãzin Luda a sisi à a sezi. Kirisi nawẽa kèare, à zé òòare, le àgõ té à kèsegbèzi yãzi.

22 Èe durun kero,
wèe ma à ege tòro.

23 Kè wà à sòsò, èe yã sílaro. Kè à nawẽa kè, èe yã pãsi ke ońero, à zè kõn Luda yãkpaekeri maaaomẽ.

24 Àmbe à wa durunno di a mià à gào lía, le wa bà tóngõ kú kõn durunno òro, wàgõ kú maakena guu. À flãgbenò bé wà wa gba aafia.

25 Zaake a sãsã lán sãano bà yã, ben a ae dò a Dàri kõn a Dãkparioa tia sa.

3

Kuuna kõo

1 Nõgbẽno sõ, à a zĩnda kpá a zãno. Tó aõ gbẽkeno e Luda yã daaro, a kuuna é n liẽ. Baa tó èe yãke ońero,

2 aõé e kè á kuu gbãsi sai, bensõ a a zĩnda kpàmma.

3 Àton tó a nõmaakee gõ mèbaa pò ùro, mitãna ke nõmaablebõno ke pókãsdanan yoo.

4 Mòde àgõ de a nõse guu yã kè è yãaroo ù, nõseyi kõn zĩndabusanao. Bee bé à bèe vï Ludane.

5 Zaake len nõgbẽ ònziri kè aõ wée ò Ludazi yãano n zĩnda kèke le, aõ n zĩnda kpà n zãno.

⁶ Len Sara de le, è Ibraĩ yã ma, è à sísi Baa. Tó ée yã maaa kee, tó ée pókè wè vĩa kee yã daaro, a Sara dà sèn gwe.

⁷ Gõgbẽnõ sõ, àgõ kúnyo nõgbẽkee dõnañne guu, àgae yã mañma, le pókè tón kpáare a aduakena guuro, zaake á de wèndi gbablerinõ ù ledome.

⁸ Beee gbera àgõ ledole vĩ kõo a píngi. Àgõ kõ wènda dõ, àgõ yekõzi, àgõ gbẽkee vĩ kõo, à busakõne.

⁹ Àtongae à zaaa fĩa bo kõn à zaaaoro. Àtongae gbẽ kè à a sõsõ sõsõro. À sa maaa one, zaake Luda a sisi, le à aubarika daagu yãnzime.

¹⁰ Gbẽ kè yezi a wèndi gõ maa, bensõ à yezi a kuuna gõ nna, à a lé kũ kõn yãzaa'onao, àton tó egee bo a lénlo.

¹¹ Adee kpèe li à zaaane, à à maaa ke, à aafia zé wete, àgõ tézi.

¹² Zaake Dii ègõ gbẽ maaanõ tàasi ke, è swã kpá n̄ aduakenanõzi, m̄ode è mìkpèe zu zaakerinõne.

Nawëakena maakena yãnze

¹³ Tó á aĩa vĩ kõn maakenao, dé bé eé wée tãawaa?

¹⁴ Baa tó a nawëa kè maakena yãnze, á aubarika vĩ. Àtongae vĩa ke aõ wétãmmananero, àton tó a swè degero.

¹⁵ À Kiriisi dõ Dii ù a swè guu. Àgõ kú soru guu gurõ píngi, le à e à yã we gbẽ kè èe a laa yã kè á wée dõzi m̄zila.

¹⁶ Àgae oñne busebuse kõn bèelinnenao. À oñne kõn nõsepuraaõ dõ, le wí gbẽ kè aõõe a sõsõõ a yãmaakena Yesu zén yãnzinõ kũ.

17 Nawēakena Luda poyezi guu yāmaakena yānzi maa de nawēakena yāzaakena yānzila.

18 Kirisi gā gèn do durunkēnena yānzi. Taari-saidee gā wamowa taarideenō yānzi, ɛ à e à gáwao Luda kiia. Wà à dè mèbaa guu, ben Luda à vù ninikεε guu.

19 À ninikεε pì guu à gàa à waazi kè gèwāadee kè wà ñ ká kpésiaannōne.

20 Aã bò Luda yā kpeεme yā, gurōō kè à mēna ai Nuu gàa à goro'ite kè à yāao. Gbē kè aō bò ín aafia goro pì gāzīnōō pariro, gōōn sōraagōme.

21 Í pì bé à de a batisikena kè è a mì sí tiaa taka ũ. Batisikena pì né mè gbāsīgogona yānlo, légbēna Ludane kōn nòsepuraaome. È ñ mì sí, kè Yesu Kirisi bò gaan yānzi.

22 À gbāaa blè malaikanōa kōn tāanōo kōn ñ gbāadeenō kōn ñ ikodeenō, ben à tà ludambe, à kú Luda oplaazi.

4

Bona kuuna ziin

1 Lán Kirisi nawēa kè a mèbaan nà, apinō se à nòse beee bori sé, zaake gbē kè nawēa kè a mèbaan, adee mì kè durun-ame.

2 Gurōō kè gōare a kuuna guu, a dà zaaa tóngae dōare ae dōro, sé Luda poyezi.

3 A kuuna kifinō yākēna guu yāa mò ɛ. Yā á kú wísaiyākēna guu kōn mèbaayā nidēnao kōn wēdekēnao kōn pāpā kōkōo kōn wēmikōkō bēēo kōn tāagbāgbāna kè Luda zàn-o.

⁴ Kè eè kakōańyo aō pāpā bíta pì kēna guu doro, è kēńne yābōnsae ũ, ben aōè a tó zaaa sí.

⁵ Aōé n̄ yākenan̄ tōkē Ludan̄, kè à yākpækēna kōn gbē bēen̄ kōn gēwāadeen̄ sorumi mà.

⁶ Wà baaru nnaa kpà baa gēwāadee pìn̄ne se, le aō e wàgō kú ninikēe guu lán Luda bà, baa kè yā vēm̄ma mēbaa guu lán gbē píngi bà.

Ludayādarin̄

⁷ Pó píngi yāana kà kīi. Beee yāńzi àgō kuu làakarideen̄ ũ, àgō a zīnda kūna dō, le àgō adua kēe yāńzi.

⁸ Yā kè de à píngilaan yè: Àgō yekōzi kōn nòseo do, zaake yenzi è pó kúe durunn̄a pari.

⁹ À kō yàari kē yāketekana sai.

¹⁰ Lán Luda gba dà a baaden̄e nà, à dōokōle ludangba bori doodo zīkeri maaan̄ ũ.

¹¹ Gbē kè de waazikeri ũ, à Luda yā ońne. Gbē kè de dōn̄eri ũ, à dōńle kōn gbāaa kè Luda à gbào, le à Luda tó kpá yā píngi guu Yesu Kirisi gāzī. Àmbe à gakuĩ vī kōn gbāaaoo gur̄o píngi! Aami.

Nawēakēna tena Yesuzi yāńzi

¹² Ma gbē yenzideen̄, àton tó yōagwana pāsī kè èe a lee b̄o a sae lán yā dufu bé à a lee b̄aro.

¹³ Lán a bà kú Kirisi nawēakēna guu nà, à pōnnaa kēo, le à e àgō pōnna bíta vī gur̄o kè Kirisi pì é b̄o gupuraa kōn gakuio.

¹⁴ Tó wà a sōsō Kirisi tó kè kúawa yāńzi, á aubarika vī, zaake Luda Nini Gakuidee kúawa.

¹⁵ A gbēke tón nawēa kē gbēdena kē kpāi'ona kē zaakēna kē gude yāńziro.

16 Tó a nawēa kè a Yesudeke yānzi, àton keare wíyā ũro. À Luda sáabu kpá ke Yesu tó kúawa yānzi.

17 Zaake wéetāmmagurɔ̀ kà, Luda gbēnɔ̀n à nàańyo. Lán wámbe à nàawao káaku nà, eé mì de kɔ̀n gbē kè aɔ̀ gí Luda baaru nnaa mazinɔ̀o diamε?

18 Zaake gbē maaanɔ̀ m̀sina kè zĩ'ũ, yā é bɔ̀ kɔ̀n ludayādarisainɔ̀ kɔ̀n durunkerinɔ̀o diamε?

19 Beee yānzi gbē kè aɔ̀e nawēa keε Luda poyezi guunɔ̀ n̄ zĩnda na n̄ Kèri náanedeene a ɔ̀zĩ, aɔ̀ kpé gɔ̀ yā maaa keε.

5

Luda sã kpàsa gwana

1 Mée lé daa a gbēnsinɔ̀a sa. Gbēnsin ma ũ se. Má de nawēa kè Kirisi kè sèedadee ũ, bensɔ̀ ma bà kú kɔ̀n gakui kè eé bɔ̀ gupuraaao se.

2 Àgɔ̀ de kpàsa kè Ludaa kàearee dàrinɔ̀ ũ. À ɔ̀ ligazi kɔ̀n poyezinao, èe ke tiasinlo, lán Ludaa yezi nà. Èe ke ɔ̀wetena yānzinlo. À ke kɔ̀n ǹseo do.

3 Àtongae gbāaa ble gbē kè wà n̄ náare a ɔ̀zĩ pìnɔ̀aro. À tó a kuuna gɔ̀ a sãa pìnɔ̀ daa zéa,

4 é kífura kè à gakui è yāaroo e gurɔ̀ kè Sādāriki é m̀.

5 A gɔ̀kparenɔ̀ sɔ̀, à a zĩnda kpá gbēnsinɔ̀a. A pínghi à a zĩnda busakɔ̀ne, zaake:

Luda è íbete kpá kɔ̀n ìadārinɔ̀, m̀ode à gbēkeε vī kɔ̀n zĩndabusarinɔ̀.

6 Beee yānzi à a zĩnda busa Luda gbāadeene, eé a sé lezĩ gurɔ̀ kè à dìεa.

7 À a yā'ɔ̀ammanɔ̀ tóne pínghi, zaake è làakari dɔ̀awa.

⁸ A wée gõ dɔ, àgõ kú a làakaria. A ibee Ibilisi de lán músu ɔɔdɔri bàme. Èe kpáe keeazi, èe gbẽ wete e à kũ.

⁹ À gíne, à ze gbãa ludanaanekena guu, zaake á dõ kè a Yesude daa kè aõ kú anduna guunɔ́ ń píngi e nawëa dõnkõ pí keeme se.

¹⁰ Luda Aubarikapingide a sisi a gakui kè è yãarooa Kirisi guu. Tó a nawëa kè fete, eé a bɔ maa, eé a ze gíngin, eé a gba gbãaa, eé a kãsãa pé.

¹¹ Àmbe à gbãa vĩ ai gurɔ́ píngi! Aami.

Lézammana

¹² Wa gbẽndo Silasi bé à lá néngo kè kèmeare. À kuum e gbẽ náanede e ù. Ma lé dàawa, má de à sèedade e ù kè yã kè má ò de Luda gbẽke yãpuraa ù. À zeo gíngin.

¹³ Babilɔnu gbẽ kè Luda ń sé lán a bànɔ́ ì kpàawa. Ma né Maaku ì kpàawa dɔ.

¹⁴ À ì kpákõa kõn lépekõanao yenzi guu. Luda amɔa kè á kú Kirisi guunɔ́ gba aafia a píngi.

Luda yá takada kǝn Bokobaru yáó
The New Testament and portions of the Old Testament
in the Bokobaru language of Nigeria

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

PDF generated using Haiola and XeLaTeX on 18 Apr 2025 from source files dated 31 Aug 2023

c31548a1-5316-53c2-be42-674e0e4c5ae5